



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

Tir Yimiyim

tiryimiyim@aolima

tir yimiyim

TAPAK 8

Cyclone Yaas atema Amit Shah-i
Chief Minister tem den senden amen

Samoa indang Ato Kilonser
parliament telungi maitdaksür



VOL. XVIII NO. 220 (ADOK 220) DIMAPUR

SANGTENNÜ (TUESDAY)

MONUPII (MAY) 25, 2021

₹ 5.00

COVID-19 Nagaland: Nisung 191 dak putet, 137 taneptsü angu & 12 asü

Kohima, May 24, 2021 (TYO): Hombarnü Nagaland nung nisung 191 dak COVID-19 putet aser parnok züngsema nisung ajak agi 20,259 kümogo.

"Tanü nisung 191 dak putet. Parnokji Kohima nung 67, Dimapur nung 53, Tuensang nung 28, Mokokchung nung 25, Wokha nung 6, Zunheboto o Mon nung pezüzü (4), Peren nung 2 aser Kiphire o Phek nung kaka (1) lir" ta Health & Family Welfare Minister, S Pangnyu Phom-i metetdaksü.

Maneni, tanü COVID-19 puteta alir nisung 137 taneptsü nguogo. Parnokji Dimapur nung 53, Kohima nung 38, Tuensang nung 13, Mon nung 10, Kiphire nung 9, Zunheboto nung 8, Mokokchung nung 4 aser Peren nung 2 lir" ta paisa ashi.

Nisung 20,259 rongnungi 14,637 taneptsü nguogo aser

tang nisung 4,714 anepaludar. Taneptsü angurji 72.25% lir, ta Minister Pangnyu-isa shisem.

"Hombarnü COVID-19 puteta alir nisung 12 asü. Parnokji Dimapur nung 6 aser Kohima, Mokokchung, Longleng, Phek, Mon o Zunheboto nung kaka (1) liasü. Parnok züngsema tasür ajak agi 297 kümogo saka nisung 12 bo tanga tashidak ajanga asü" ta Integrated Disease Surveillance Project atema state nodal office officer, Dr Nyanthung Kikon-i ashi.

Nagaland nung COVID-19 puteter nisung 611 tashi tanga state temi ogo, ta paisa shisem.

"Nagaland nung COVID-19 alitsü akok ta temolung melemi sample 1,84,709 tendangogo. RT-PCR ajanga 87,335, TrueNat ajanga 53,861 aser Rapid Antigen Test ajanga 43,513 tendang," ta Dr Kikon-isa ashi.

Covid-19 agi shiranga asür mang endoktsü atema metetdaksür

Dimapur, May 24, 2021 (TYO): Ministry of Health & Family Welfare, GoI aser Home Department, Nagaland State Disaster Management Authority ajanga SOP latetba nung ajemdaker Dimapur district administration-i tasü mang endoktsü atema inyakim kar metetdaksüogo.

Hombarnü Deputy Commissioner Rajesh Soundararajan, IAS-i Covid-19 agi shiranga asürtem mang anepalua endoktsü indang osang metetdaksü.

March 15, 2020 nü Union Ministry of Health & Family Welfare-i SOP latetba ama Nagaland State Disaster Management Authority (NSDMA)-ia April 13, 2020 nungi iba inyakim benshir, ta

Dimapur DC-i Hombarnü metetdaksü.

Covid agi shiranga asür mang mozü kidang jungjunga anepalua alepbangba sülen kinunger ket nung agütsüta ta SOP lateta lir. Ajisüaka, kinunger mesüra medemertem maliba tasü mangtem State Disaster Response Force (SDRF)-i anepalua aremsü, ta paisa ashi.

Ano, Covid-19 agi asür kinungertemi senotsü mesüra nübo maliba ajanga mang agizüka bener moutetsüsa kümra SDRF-i mang endokba nung yariteptsü. Maneni, mang endoktsü atema senotsü maliba sensaker kibongtem asoshi District Task Force-i mang endokba nung endokba sen agütsüta, ta Dimapur DC Rajesh Soundararajan-isa metetdaksü.

Nagaland nung COVID-19 putetba ajema akümer



Kohima, May 24, 2021 (TYO): Tesüiba anogo 20 tsüngda Nagaland nung COVID-19 putetba ajema kümogo ta Nagaland sorkar atema co-spokesperson & Advisor, Mmhonlumo Kikon-i ashi.

May 7 nungi containment zone lemsaba aser ano May 14 nungi state ajanga total lockdown asüba ajanga May 3 nü sample positivity rate 23% liasüba nungi May 23 nü 18% ajemogo, ta pai ashi.

"Nagaland nung COVID azüksü atema sample testing süa aru aser tapi agi sample 2000 tema bendenba nungi 20% nung putetogo. Tapi agi tendangba mapa ya maneni inyaksü," ta Kikon-isa ashi.

Nagaland nung anogoshia sample 1200 nungi 1300 tendanga arur. Sorkari Covid menatetba, sample nung putetba aser COVID-19 hospital tem nung yipden osangtem repringshiba sülen lockdown mapang atsülangtsü mesüra anentsü atema telemtetba agitsü, ta paisa metetdaksü.

BLACK FUNGUS ANGATI ANEPALUTSÜ:

COVID-19 agi shirangertem dak steroids amshiba ajanga linük nung Mucormycosis (Black Fungus) kanga puteter aser iba atema Nagaland sorkari 'notifiable disease' küm daksüogo.

Tanü tashi Nagaland nungbo black fungus putetba osang mali saka sorkari health ministry dang iba tashidak anepalutsü atema mozü alitsü osang yokogo, ta

Mmhonlumo Kikon-i ashi.

"India sorkari Mucormycosis (Black Fungus) agi shirangertem angati dang anepalutsü. Iba tashidak agi shirangertem nem agütsüba mozüji jenjang kanga tasak aser Centre-i mozü timba yanglutsü telemtetba agiogo" ta Integrated Disease Surveillance Project atema State Nodal Officer, Dr Nyanthung Kikon-ia ashi.

MOZÜ KI YIPDEN & OXYGEN

Nagaland nung COVID-19 agi shirangertem anepalutsü atema Dimapur kübok Dimapur nung yipden 176 renemogo aser Mongulbar nikongdang nungi shirangertem anioktsü, ta Advisor Kikon-isa metetdaksü.

"Senotsü peria meliaka Nagaland sorkari nübertem taküm kümzük ayutsü atema inyaka arur. Iba COVID hospital ajanga Covid-19 shirangertem anepaluba den essential medical services timtem meli agütsüta" ta paisa ashi.

Külen, Mongulbarnü Chief Minister Neiphiu Rio aser cabinet minister kari Chumukedima police referral hospital nung yipden 30 lapoktsüta. Ano, Dimapur nung PSA plant asüng nungi lapoktsü, ta paisa shisem.

"Sorkari district balala nem oxygen cylinders 1,158 lemsüogo aser depot nung 980 yua lir. Asüng Hyderabad nungi ano 800 bener arutsü. Nagaland nung oxygen peria dang lir anungji nisungtemi shisabulu masütsüla" ta Kikon-isa shisem.

COVID-19 INDANG MOZÜ

Health Ministry-i COVID-19 agi shirangertem nem agütsüba Remdesivir indang vial 8,500 lemsükja lir aser iba nungi vial 1,400 nguogo. State kübok tesem balala nung Covishield indang dose 1,18,050 lir, ta paisa metetdaksü.

Pharmacist temi parnoka frontline workers ama vaccine agitsü asüngdangba atema Advisor Kikon-i ashiba agi, "vaccine agitsüper telemsa balala lir saka pharmacist atema telemtetba kecha magi."

Nagaland sorkari lockdown atema tetuyuba ka agüja lir aser district task force (DTF) temia pei pei telongtet nung inyakimtem lateta lir. Anungji colony, ward mesüra yimtsüng ketdangsurtemi DTF alema meinyaksüla, ta paisa metetdaksü.

"Iba wara anema rara nung colony, ward aser yimtsüng ajaki amalitepa yariteptsüla" ta Kikon-isa ayongzük.

SCHOOL LAPOKTSÜ TEBILEMBA MALI

"Hombarnü online class tenzükogo" ta School Education Principal Director, Shanavas C-ia metetdaksü.

"Asenoki classroom education melentsü makok saka tang atema taküm kümzük ayutsüba kanga tongtipang lir. Covid wara tasembuba ajanga tanurtem dak kanga mejungi kongshitsü ta ashir anungji tangtangbo physical class tenzüktsü tebilemba mali" ta Shanavas C-isa ashi.

Kaketshirtemi timtem melii online tatidang agütsütsü: ANCSU

Dimapur, May 24 (TYO): Nagaland nung COVID-19 anema raraba mapang ka nung online mode ajanga kaketshirtem tatidang agütsütsüba lir, ta All Nagaland College Students' Union (ANCSU)-i metetdaksü.

May 27, 2021 nungi June 26, 2021 tashi BA/B.SC/B.COM/BBA/BCA indang Nagaland

University Three Year Degree Course tatidang agitsü. Anungji iba mapang kaketshirtem nem power supply aser internet connectivity shitak agütsütsü atema bangdakpurtem dang mepishir, ta ANCSU-i tanü sangdong ka nung ashi.

Tatidang online inyakim nung agiba nung tesayurtem aser

college ketdangsurtem mapa talila inyaksü lir aser iba atema ANCSU-i parnok dang pelar. Maneni, kaketshirtemia online exam ya tatidang nung takok angutsü atema dang masü saka shisaliok chichiba angazüktsü tangatetba nung meranga zünger agütsütsü ayongzük, ta parnokisa metetdaksü.

ASTD OFFICE AJANGA AOER ZÜNGSEM AJAK DANGI

Temiem züngsem tajungtem ajak dangi ASTD mendenti ajanga salem abener.

Asen Ao Senso Telongjem Dimapur tenung nung ASTD Covid 19 Relief Corpus Fund ka lapoka Aotsür Aoertem Covid 19 wara agi asürtem aser hospitalised süa shirangertem nem tiyari agütsüdag. Iba nung arogo, lokti, kibong aser kija ajaki shilem agitsü ayongzük.

Tenlaner kar lira agüja aliba contact number 9436066690/8732002080 ajanga tongteprateptsü akok. Account nung inoktsüner kar lira teküpoklen Account Number agütsür. Nenoki iba account number nungji enoktsür agüja aliba contact number nung nü identity tejangja agütsütsü mepishir.

Account Number : 101410006042375

IFSC : UTIBOSNSCBI
Nagaland State Cooperative Bank Ltd.
Head Office, Dimapur

Branch Code : 1014

Sd/-
Meren Nokpu
President, ASTD
Ao Senso Telongjem Dimapur.

Chumukedima nung water tanker ka meshitetogo



Dimapur, Monupii/May 24 (TYO): Chumukedima Town Council indang office nung May 24, 2021 nü sentong tatsüka agia, Chumukedima Town Baptist Church indang Pastor-i tzü abenba gari (water tanker) tasen ka meshitetja liasü.

National Clean Air Program

2020-21 kübok Nagaland Pollution Control Board ajanga iba tanker alitsü atema senotsü teyari agütsüba atema Administration, Chumukedima Town Council ajanga sentong nung pelaba lemsatepa liasü.

Aoyi aser mopung menenba azüokba maparen nung amshiba den külemi

Chumukedima Town Council ajanga iba gari ya Chumukedima Town kübokaliba ward ajak nem lockdown mapang anogo lateter tajemtsüb tzü temürek angati agütsütsü, aser ibaji ajanga jila nung tzü agi anüingba tebilemstü ajemdaktsütsü, ta sangdong ka ajanga ashi.

Niuland aser Kuhuboto health centre nung nüngdakba oset mali: WSYF

Dimapur, Monupii/May 24 (TYO): Tashidak wara agi alima ajunga sünger lia frontline worker, talisa health worker temi state nunga kinük-kisang ajungalen anibelem mesasai nübur tenzükba atema tentüngsang agütsür, ta Western Sumi Youth Front (WSYF) ajanga sangdong ka nung metetdaksü.

Healthcare worker nem senotsü teyari talila agütsütsü sangdongba atema WSYF ajanga sorkar dang pelar, ta ashi.

Ajisüaka, Niuland aser Kuhuboto health centre tem nung inyaker atema nüngdakba

oset maliba atema süoki ia bilemstür, kong facemask, faceshield, gloves, sanitizer, PPE aser oxygen teperi agüja mali, ta sangdong ajanga ashi.

Niuland nung oxygen cylinder asem aser Kuhuboto nung ana dang lir ta angazüker, aser ajak ya tang tamshidak ta ashir. Dimapur nungi meta talangka pilar süaka, yangji nüburtem ajungtsü mechi DTF Dimapur aser CMO Dimapur dang facility tajungba agütsütsü mepishir, ta WSYF ajanga ashi.

Health facility jenjang tali tejangjaba nung metetstü atema Niuland semdangba

asoshi Nodal Officer, Y. Kikhetto Sema, IAS aser par teloki danga WSYF ajanga pelaba lemasateper. Nodal Officer-i health centre tensa ngur alinung, Niuland aser Kuhuboto nung nüngdakba facility agütsütsü pa dang mepishir, ta sangdong ajanga ashi.

Nüngdakba mapang aser akokba yari nung Team Dimapur den yariteptsü onok renema lir. Tensa agi tsüngtong arua ajuruteptsü tasak alinung DTF, CMO aser Nodal Officer ajanga iba sangdong ya temolung nung shishia agidaktsüner, ta WSYF ajangasa ashi.

Mon jila nung lenmang/kilenzü aodak oset bendenba nokdang

Dimapur, Monupii/May 24 (TYO): Mon jila nung ali tuzükba, ki-o-jen yangludang amshiba oset amala nübur jajaba lenmang nung nangdenba mesüra ki-o-jen yangludak kilenzü aodak lenmang nokdanga oset nangtenba ajanga tzü atsüngtenger aser lenmanga temesüba kumdaktsür, ta ADC

Mon & Administrator, Mon Town Council, Y. Chingyak Konyak, NCS ajanga May 24, 2021 nü sangdong ka nung metetdaksü.

Anungji iba totuyuba agütsüba anogo nungi hopta ana tsüngta nüburtem jajaba lenmang mesüra kilenzü aoba nokdanga ali, ki-o-jen yangluba

osettsüset aser tatsütsü süng amala nangtena aliba ajak agientsü metetdaksür, ta sangdong ajanga ashi.

Iba totuyuba nung manidakra, tashiyim agi osettsüset agientsü aser ozüng agi melaba ama tapet temerenshi agütsütsü, ta sangdong ajangasa ashi.

Wohka District Task Force pur senden amen

Dimapur, Monupii/May 24 (TYO): Wohka District Task Force for COVID-19 pur senden ka May 24, 2021 nü Deputy Commissioner indang Conference Hall nung mena liasü.

Iba senden nung Deputy Commissioner & Chairman, District Task Force, Wohka, Orenthung Lotha menden liasü. District nung COVID-19 cases aser COVID-19 dak sendakba nung asü-amaba tali akumba ajanga aser tarutsü nung iba ama tensa tajungtiba nung azüoktsü mechi senden nung COVID-19 agi asüba temang ketdangtsü indang jembu aser Deputy Commissioner ajanga

COVID-19 agi asür temang indoktsü atema committee ka tentetstü atema Chief Medical Officer dang asüngdanga liasü.

Nisung tasü mang belenshitsü atema ADC & Administrator, Wohka Town Council ajanga anepalua aliba garitem nem tang jenjang atetja aliba sen agütsür amshitetsü, ta Deputy Commissioner-i ashi.

Iba senden nungsa nija mozüki/clinic aser nursing home tem nung COVID-19 agi shiranger atema yipten shilem 50 wazüka ayutsü, private practitioner (doctor) temi counselling agitsü aser temaba ketdangtsürtem den shisa

agitepa COVID-19 sample tendangtsü indang onüktem benoka jembu. District nung maneni tapi agi COVID-19 tendangtsü, ta senden nung lemteta liasü.

District Hospital ya COVID Care Centre kumdaktsür alinung, Christian Medical Centre (CMC) nung danga agi shirangertem anepalutsü, ta CMO ajanga senden nung metetdaksü.

Deputy Commissioner-isa nüburtem dang pei kumzükba alitsü mechi sorkari sangdongba SOP aser teinyakstütem ajak shidak inyaka item sülen kumdanga anidaktsü ayongzükba liasü.

MOKOKCHUNG NUNG COVID-19 VACCINE AGITSÜ ATEMA TEMETETTSÜ KAR

1. Küm 18 nungi 44 tashi hombar aser mongolbar anepdang 10:00 AM nungi nikongdang 4:00 PM tashi COVID-19 vaccine agitetsü.
2. Küm 45 nungi temapurtem Bodhbar anepdang 10:00 AM nung nikongdang 4:00 PM tashi COVID-19 vaccine agitetsü. Item anogotem nung 1st dose aser 2nd dose agitetsü. 1st dose agir anogo 84 [tir pezü] sülen 2nd dose agitsüla
3. Item timtem lira COVID-19 vaccine agitsü atema Session site-i marutsüla:
 - * Na temang mejongi lira
 - * Ainlen nungi arua lira
 - * Isolation nung alidang
 - * Containment area nung alidang
 - * SOP tetuyuba ama lira
4. COVID-19 vaccine agitsü atema booked sua yur,iba anogo nung mozü magitetsü sa kümra anepdang 10:00 AM matongdanga appointment cancel asütsüla.
5. COVID-19 agi shiranga lira ita 3[asem]lir külen ang vaccine agitsüla.

DR. AVANGLA SAKÜ
District Programme Officer UIP&RCH
Mokokchung, Nagaland

Tanü "Tasüla Wara" ken sayatsü



Dr. Imotemsu (abelen) aser Bendang Imchen (achiji).

Dimapur, May 24 (TYO) : raraba, ayawara aser tasüba Nüngtugu kentener tajung tashidak wara agi lendong Bendang Imchen aser timtem tulu nübortemi ajuruba Dr.Imotemsü nati atenba ken angur. Item ajak ya Laishiba nung zülua aliba ataloker, ibai nung zülua aliba ataloker, ibai YouTube, Facebook aser asenok ajak asoshi tamang WhatsApp nungi angatetsüsa tendangba mapang ka lir, sayatsü ken tasen ka renema lir. anungji Peter ama tamang seplasepshi mesüi tang asenoki

Iba ken ya tanü tashidak ajuruba tatidang aser tetsübu wara tulu ajuruba tensa indang ajak ya kokdi. Tsüngrem bilemdanga Mathi 24:7 nung chirtem asoshibo ibai tepelatsü ajemdaker mejemba ken ka lir. anogo lir," ta iba ken mejemer "Tang asenoki alima ajaklen aser ateneri metetdaksü

Chozuba Sub-Division kübok VDMA tentetstü metetdaksü

Dimapur, Monupii/May 24 (TYO): Additional Deputy Commissioner, Chozuba ajanga Chozuba Sub-Division kübok aliba yimtsüng ajak nung Village Disaster Management Authorities tenzüktsü totuyuba agütsüogo.

VDMA nungya yimtsüng nung health worker aser danga volunteer tem dendaktsütsüla, ta ashi.

VDMA indang teinyaktsü mapa yamai alitsü:

1. Sorkar indang agency yaritsü.
2. Nisung tasü mang anepalutsü aser ketdangtsü.
3. COVID-19 dak sendakba cases tem mita repranga aser District Task force/Block level task force den amalitep alitsü.
4. COVID-19 putetba mapang ketdangtsürtem totuyuba nung

ajemdaker ki shibangtsü/ mükabanga ayutsü. Taneptsü anguba mapang ketdangtsür nungi totuyuba agütsüba nung ajemdaker ki shibanga aliba/ mükabanga aliba lapoktsütsü.

5. Yimtsüng nung sorkar indang SOP aser COVID-19 totuyuba tem mapa kuma inyaktsü.

6. Yimtsüng nung nüngdakba aser tongtipang osangtem prokshitsü.

7. District Task Force/Block Level Task Force ajanga nungloktsüba mapa inyaktsü. Committee nem Medical

Department-i nüngdakba mapang anasatiba CHC/PMC nungi SMO/MO mesüra health worker ajanga PPE kit, gloves, mask, sanitizer aser body hag amala agütsütsü, ta sandong ajangasa ashi.

State aikati Tripura indang 'bamboo leaf tea' aginür



Agartala, May 24, 2021 (Agencies): Tripura nung yangluba aou tou agi yangluba süngo (bamboo leaf tea) tanga State temi kanga aginür.

"Tripura nung yangluba 'bamboo leaf tea', koba mozü ama lir, iba aou tou süngo yagi linük kübok kinükisang nung aliba tesem balala nungi importer tem atsüa arudar" ta Agartala nungi 'bamboo leaf tea production' maparen nung inyaker, Samir Jamatia-i ashi.

Paisa ashiba agi, "bamboo leaf tea touzük seret 500 jungnüa mezüing consignment

seret nung Rs 120 agi Delhi nungi importer ka dangi yokogo."

"Ano Madurai nungi tebur ka, shiba Tripura nung anogo asem tashi monga iba süngo yangluba maparen ajunga study süngo. Pai seret 3-4 shi aliogo," ta Samir-isa ashi.

Samir ya linük balala sema senzüba nisung ka lir aser aou dak sendakba maparentem study asütsü atema China nunga pa küm aika mongogo.

Samir-i ashiba agi, mongintemi bamboo leaf tea nung antioxidants aser

antibiotic properties peria lir ta amanger. Süngo nung silicon jenti aliba ajanga kou, teküp/sentsü aser temezüing den külemi teret aser tepo tashi itta yutsür.

"Bamboo leaf tea teronem balaka lir. Tripura nung aou tapu 21 tashi adoker aser item aou tapu ajunga nungi süngo yanglutettsü akok," ta Samir-isa metetdaksü.

Paisa ashiba agi, aou süngo tou lanu bendenba nungi tenzüka süngo yangluba aser packaging maparen ajak Tripura state nung dang inyaker.

Jagiroad railway station nung passenger tem dak Covid19 metendang



Guwahati, May 24, 2021 (Agencies): Linük tesem balala nung Covid19 tashidak puteter timba küma aoba mapang ka nung, Deobarnü Assam kübok railway station nung train nung arur nisung 400 dak tema Covid-19 test magii aritepa dang station nungi oadok.

Deobarnü Jagiroad railway station nung iba ya atalok. Iba tesem ya Guwahati nungi kilometer 60 shi pila orr lir.

Train passenger tem, shirnok tanga tesem nungi arur aayangertem timba, parnok rongnung tetsür aser tanur dena lir; aser parnok ya Kanyakumari-Dibrugarh Vivek Express ajanga aru. Iba train

ya Tamil Nadu kübok Kanyakumari nungi aruba liasü.

Assam atongtsü atema anogo pungo tashi iba train (Kanyakumari-Dibrugarh Vivek Express) ya Kerala, Andhra Pradesh, Odisha aser West Bengal ajanga aru.

Train nung senzusenbongertem atema Covid19 test agitsü Assam sorkari ozüing latetja lir.

Social media sabang ajanga prokba video nung, iba railway station nungi passenger jenti nungtepa aoba aser iba mapang police aser railway ketdangsürtemi kecha meinyaki yutsüba nguogo.

Taoba ita Bihar nunga ka iba

ama atalokba osang ajanga angazükogo.

Covid19 tendangtsü tetsübu nung tanur tila anir alir densema nisung jenti Buxar kübok railway station nungi nungtepa tukuba nguogo.

Tesuiba ghonda 24 tsüingda, Assam nung nisung 3,563 dak Covid19 tashidak tasen puteta aser iba wara ajanga nisung 72 tashi taküm samaba mapang ka nung Jagiroad railway station nung iba ya ataloker alitsü.

Deobarnü, Assam indang positivity percentage ji shilem 5.68% liasü.

Tashidak tasen puteter rongnung, Kamrup Metro district kisüing nung nisung 624 dena lir.

Diphu nungi osangbener ka Dimapur gari lendong ka nung asü

Dimapur, Monupii/May 24 (TYO): Diphu nung alir osangbener ka Dimapur nung nija mozüki ka nung asü. Osangbener Rajib Mech ya lenmang nung gari lendong ka ataloka asü aser pa den alisang osangbener Rajesh Tappa kangasa mejungi yirua liasü, ta

osang ka ajanga ashi.

Osang ajanga ashiba agi, Mech den pa medemsang tena ya Diphu tsütsüi Honibar aonung pa indang Maruti Swift Dzire gari nung aoba mapang lendong ya ajuru.

Honibar aonung 11:30 ako meta NH-36 nung Dilai anasa

truck ka anena alidak tesülen nungi osangbener mena aliba gari yagi oa atsük, ta ashir.

Iba lendong atalokli Mech ya DMCH nung anir oa anepalu aser ano mozüki dangai yok. Pa ua Dimapur nung nija mozüki ka nung admit asü saka yangji pa takum tembanga liasü.

YouTube kati Arunachal Pradesh anema jembiba atema ken o benok

Itanagar, May 24, 2021 (Agencies): YouTube kati Arunachal MLA ka aser Arunachal Pradesh lutsüba anema ken o ka benokogo ta Arunachal Pradesh Chief Minister Pema Khandu-i Hombarnü ashi.

State police department-i Paras Singh ta ser YouTube ka anema ken o benok.

Iba nisung indang social media account kanga junga bushisüingdangdar aser pa alidak

metettsü atema bushitepdar, ta Chief Minister Khandu-i ashi.

Deputy Chief Minister Chowna Mein-ia YouTube aitsüogo.

YouTube nung Paras-i Arunachal Pradesh MLA indang tereprangtsü aser tenüing atema menütsü.

Paisa Arunachal nungger ya India nungger memesük ta ashi aser Arunachal Pradesh ya India kübok state ka asüba atema ashishi.

WHO-i Manipur nem Oxygen Concentrator 150 agütsü

Imphal, May 24, 2021 (Agencies): World Health Organization (WHO)-i Manipur sorkar nem COVID-19 anema inyakba nung amshitsü atema oxygen concentrators 150 agütsüogo.

Hombarnü Manipur Chief Minister N. Biren Singh-i Twitter nung iba osang metetdaksü.

"International organisations nungi Manipur dangi teyari balala arur. Tanü World Health Organisation-i Manipur sorkar nem oxygen concentrators 150

tenla agütsüogo. Asenoki COVID anema inyakba nung oxygen concentrators ajanga teyari tulu angutsü aser WHO dang kangasa pelar" ta Chief Minister-isa ashi.

Tang tashi nung Manipur nung nisung 44,089 dak COVID-19 putet aser parnok rongnungi nisung 6534 anepaludar.

Manipur nung Covid-19 nungi taneptsü angur nisung 36,867 lir aser ibaji 83.61% lir aser nisung 688 tashi taküm samaogo.



Hombarnü Assam nung Kokrajhar district kübok tetsür chanu arishi küm 9 tain dak tashiyim agi mapa tamajung inyakba ajanga police arishi küm 60 tain Raghunath Narzary apuba noksa nung angur.

Mizoram nung nisung 113 dak Covid-19 putet

Aizawl, May 24, 2021 (Agencies): Tesüiba ghonda 24 tsüingda Mizoram nung nisung 113 dak Covid-19 putet aser Hombar tashi state nung iba nisung 10,333 tashi dak putetogo.

State nung COVID-19 puteter rongnung tebur 6395 aser tetsür 3,938 lir, ta Department of Information & Public Relations (DIPR), Mizoram-i metetdaksü.

Tang Mizoram nung nisung 2,461 tashi tanga anepaludar.

Tashidak tasen puteter rongnung Rapid Antigen Test ajanga nisung 105 aser TrueNat test ajanga nisung 8 dak Covid-19 positive putet.

Deobarnü Zoram Medical College (ZMR) indang lab nung RT-PCR test agia liasü.

Hombarnü, Mizoram indang Covid 19 positivity rate 13.93% tashi kümogo.

State nung iba tashidak adoker külen nungi, nisung 33 tashi taküm samaogo.

Ajisüaka, tesüiba ghonda 24 tsüingda tashidak tasen puteter dak alaka, iba tesashi wara ajanga nisung ka danga masü.

Deobarnü, Mizoram nung COVID-19 agi nisung ana asü.

Mizoram nung Covid-19 puteter nisung 7,839 tashi taneptsü ngur mozüki aser Covid-19 care center balala nungi yokogo.

State kübok Covid-19 tashidak agi shiranger timtiba aliba tesem ji Aizawl alitsü.

Tang, Aizawl nung Covid 19 agi shiranger nisung 1,932 tashi lir. Kasa mapang, Kolasib nung 130, Lunglei - Serchhip nung 97, Lawngtlai - 70, Champhai - 46, Saitual - 39, Siaha - 22, Mamit - 17, Khawzawl - 9 aser Hnahthial nung nisung 1 alitsü.



TIR YIMYIM YIMOBILEM (EDITORIAL)

DIMAPUR SANGTENNÜ, MONUPII (MAY) 25, 2021

Tenla agütsütsüba mapang

Government dang nungi asenoki inyakba mapa ajak nung asenoki teyari imlar, kechiyong government-ji nübortem anepalutsü asoshi akümba yimten lir, anungji government nung alirtemia nübortemi imlaba ama alitsü nungdaker. Government-ji tangar masü saka election nung adoker yimsü asürtem aser parnok den yaritepertemji department balala nung ketdangsertem, parnok ajakji nisung, anungji nisungi nisung dang nungi teyari imlatsü aser nisungi nisung yaritsüba alima nung inyaktsüba mapa ajunga agi aji dang lir. Ajisüaka, yaritsüba ya government-i dang nübortem yaritsüba masü saka nübortemia government mapa nung yaritsü nungdaker, kechiyong government-i inyakba mapaji government nung alirtem asoshi masü saka nübortem asoshi inyaktsür. Talisa, tang ama tashidak wara tesashi den raradang, nübortemi mapa aser teyari ajak government nung alirtem nungi dang imlara, kitsük-kirong mapang peisasa mi enseptsü kecha memerangdangi fire brigade pur aru ataa kazüba amai asütsü. Aji oda, tatar senden nung opposition purtem asoshia tang ama mapang ya government-i nübortem asoshi inyaktsüba mapatem repringshiranga matongba tongdaksütsü, meshitakba shitak kümdaksütsü aser meperibatem peridaksütsüsa pei nübo, shisatsü aser rongsen tenla agüja inyaktsüba mapang tajungtibajibo tang ama mapang tamajungtiba ya lir. Tanü asenok tia majung, Naggaland state kümer küm 60 tashi nunga asenoksasa asenok menokdakteter, iba jagi tang ama ajungben alima lendong mapang ya tanga limatem nung nübortemi shilem agiba dang nungi tali asenoki agitsü nungdak adoker. Iba amajika mesüi asenoki akhi ama mapa aser teyari ajak government dang nungisa imlara, government nung alirtemi anir asenok ajak tesama lendong tulu ajurutsü ana nung lir. Tang asenoki ajuruba Covid wara anema ya asenok yaküm nungi tongpang nung nokdaker. Meimlaika, iba wara yagi yaküm küm asen lima tonga arudanga nübortemi government dak dang meimlai peisasa nübo aser rongsen tulu agüja yaritepogo. Iba tongpang nung, talisa, arogotemi sarasadem aser rongsen agi maneni government nung alirtem den yaritepa inyakba angur. Iba kasa teyaritep ajanga mozü kidang shirangertem asoshi nungdaktem aser ano mozü kidang inyakertem atema kiojen aser tanga nungdak balala nübortemi mulungsua tenla agütsüba agi asen lima nunga Covid tongpang ya takok ngua raradagi. Iba tashi aser temulungtetba nung senso shiai pei akok temulunger tenla agüja mozü kidang aser mozü kidang inyakertem nungdak repringteta mekorui tenlatsüba mapangji ano tangsa tenungdakba kümogo. Ibai yimer ajak tongpangi odaksür asen kija asen mapa inyaka mesüra anisungzüka amongtsüba mapang dangbo masü saka asena tongpang nung nokdaksüba mapang lir. Atangji, iba tashidak wara tongpang nung shilem agia nokdabaji sensosanger ajaki government-i ashiba angaa anidakba ya ka asütsü. Iba ama shilem denji külemi takokeribo, ano nia kechi tenlatsü (?) ta bilemdangtsüba kanga tongtibang lir. Aji oda, iba tongpang nung shilem aginürtemi pei alidak lokti aser arogo ajanga inyakba mapatem nung pei akok tenla agüja shilem agira, arok ser iba tongpang nung kanga tashi aser tasü itta shilem tulu agitetsü. Atangji, repringdangra government tsütsü tamakok aser tezudangtsü mapatem aika angutsüa akok, saka item ajakji mangu aser mangashi kümer, tamasa, asenok ajak taküm kümzüksü nükjidong nung asenoki government-i makokba aser meperitsütetba nungdaktemji peridaksüteteta tenla agütsütetra, tongpang akoktsüba hadir tajungtibajibo aji asütsü. Iba ama mapang ya, taoba US tir, John F Kennedy-i par nübortem dang ashiba ama, "ozü lima aser ozü government-i kü nem kechi inyaktsür ta masü saka nea ozü lima aser nübortem asoshi kechi inyaktsütetetsü," ta bilema tenlatsüba mapang lir.

OLEMSABANG

Ao oshi ya shir kibur asütsü?

~ S. T. Yapang Lkr. Kohima

Ao oshi indang tamalen aiben zülua aruogo, item to tatsüba nung bilemtetshitsü asoshi lepshiba den ano kar bendenloksema lemsatepnür.

Ao oshi nung tila tanur lir, tanur temang tulu teyira asütsü akok, saka pa/la dangji tila tanur ta ajatsü. Aor shirnok tangar oshi jenti meteta temezung nung janga lir, saka Ao junga mashi parnok kanga menütsüa ashitsü, "Tila tanur lir, saka tulu tanur mali, anungji Ao ya tai mesüra tulu tanura alitsüla" asenokia item pur dangji kechi ta langzüksü? Oshi aika nung tajung lira tamajung alitsüla, tila lira tulu alitsüla ta temzung alitsüa akok, saka asenokbo parnok sülenji mesüli, asenok sülen dang parnokji südaktsüdi. Tang asenok par sülen anidakra par oshiji teti asen dang küm merijang ana asem agi tambu asütsü, anungji tangar oshi nung takar akümbaji junger, saka asenok par sülen mesüi asen sülen dang parji südaktsüdi, tetezüji tila tanur lir saka tulu tanurji maliyonga asen oshiji aji agi peridaksüdi. Alima rangben nungi tashitemeteter ajak arua "Nenok Ao oshi nung tila tanur lir, tulu tanur mali" ta shira, asenoki shidi "Nenok alima rangben onok sülen anidakang, nenok mapang süiogo, ya aso tasenba yimya tasen ka lir, onok oshi ya sobaliba den sentaktepa aliba oshi ka lir, iba jakiang 'züngi menti' ta jembir, 'menti züngi' ta jembiba asoshi senchi mali, saka pa/la Ao oshi mashiba sayuba mapa ka lir, alemli nungi Aori metsüjangnüsü ya kasa anogo ka nung züngi aser menti amala külemi dang zünga aru, saka kodanga menti tama madangtsü, züngi tama adanger iba jakiang züngi menti ta jembir südi, saka aji temzung ozungbo masü. Anungji Ao oshi ya tangar oshi den metemdangteptsü nungdak mali, nungdak süra tangar oshi ajakji Ao oshi sülen anidakang."

Aor nisung shiai agizüktetsüba Ao oshijibo yim shia kaka asütsüla mesüra Junglir sasep nunga süngla tzükong shia tera balala aser nungjakojabo khenyongi balala asünungji ishiba agia Aor oshi metsü shika asünung ang asenok ya merarateptsü mesüra oshi meputepba ya malitsü. Ajisüaka tang ka akaba ya süngla bener moteter nung timba akümstüji matong ali nung temtok ama dang asütsü.

Tang asenoki züluba aser Jungli Mongen tsüngda angatettepa jembiba Ao oshiba ya Jungliria yamai mejembir, 'ain' 'antsü' ta Junglir timbai pei yimdak jembir, saka tangar, talisa Mongsener alidak jembidang 'an' 'entsü' ta jembir, anungji tang züluba ama jembiba ya shir kibur asütsü? Ya Jungli Mongsener anaprong kibur aser aji tanükerji Ao Senden kibuba lir. Tang züluba ama junga jembiba dang Mongseneri 'Jungli o' ta ajar, saka Jungliri 'Aiener o' ta ajar. Anaprongi kiburji tangar ama bilemer, anungji iba ana ya senteper Ao oshi ta asübjiang tabensaba, tang zülua amshiba nunga ni Junglir ka süaka kü danga temelneshitsüla aika oda zünger mezüngma lir, saka onoki shitak junger asüba dang enok nung tangar aikadi mangatetsü mesüra tai ta ashitsü.

Ao Senden kübok Ao Senden Litration Board (ASLB) shima aliyonga takaba ajak shiloka meyutsüi teinyaktsü tashi lemteta yutsür agütsü ang shitak ta nibo bilemer. Iba den nütsüng nüburia item ya meteta alitsü junger;

1. Ojang kasa alibatem ka danga memelenshitsü mesüra melentsü süra küm ishika telatet yutsür ajak melentsü, joko iba sülenbo memelenshitsüla. Shisatsü dena aliri shisadangang, 'am' yaki tetezü balala aika adoker, ibayongji 'am (somomo tu) ka arep' ta zülua/jembia aruogo, tang aam ta melenshi, aji ni asoshibo majung, saka kecha masü anidakdi. ASLB züngsemji tang alir yasa asütsü masü, tarutsü nung ano tasen shimertemi 'azü' ya azüh/azhü/azzü/aazüü ta amala ojang tapu balala küma lemsatsü, süra 'mashi' metsür pezü tashi P. Alem Jamiri züluba Ao Oshi Ojangrük kaket nung likaji, aji shibai kodang balala küma lemsa amungtsü aser telemsaribo lemsadiko aji shiri kodang angazükmatetsü? Tang ASLB puri am nungi aam ta melenshira parnok sülen aruri azü yaki tapu terpungu tashi melemsatetlima? Parnokjibo mashi memetet arutsü asü? Iba Ao Oshi Ojangrük kaket nung ojang kasa 625 agi tetezü balala 2578 agütsüba jangratemtsüka lir, saka ano aika ya ngur amui moteti balala küma lemsanüa lir, yamaji melenshidi süra ano küm noklang ka shi nungbo ya memelenshimatsü aser mangazükmatetsü. Asen Naga kin tangar zülumen memelenshir, saka asen Aorbo e aser ü melentep manener, e aser i, o aser u, t aser d melentepba manenteter, revival nung tanela temeshii apuba masü temenen tanelai apuba ama tang tashi manenteter aser ano manenli asür, aji oshi renlokba masü benjaba lir, anungji joko asenok ya apusodi, asenok Aor ya car nung khu oshili agizükli, tejaklen aliba tesülen enokli ano tesülen aliba tiyongi bener atuli ta küm paika ya amunger, joko aien talangi aotsüba asünungji apusotsü mapang tongjala tongogo. Asen dang tesü apusoba joko tangar tatongtsü tonga, mapa ajak renemer meyipa arua ki tonga merükmejur anisungzükdaki. Asen oshi kanga tongmelang aser ojang aika kasa lir, saka ojang jakdang mesüra tesülen aliba agi tetezü bendanger, ibaji tanga oshi nunga aika yamaji lir, mesüra asenok tanga oshi nung moingtemi Ao oshi yangludaktsüra English nung ama meputep aika yanglutsütsü, number ta talangba nung lir, saka tatsüba nung No. ta züluba ama akümstü. Joko azü ojang kwi lir aji azü nungi temelenshi mesüra yamala mesükba kasa ojang kwika lir ajakji ka danga memelenshitsü ozüng ka yanglutsü tim, aji mesüra nenok anemaa Ao Senden dangi keno abentsü, parnok agizükra asenok yangji atsütepa jembidi, shir Ao ashi aser shirsa mashiar atsütepa jembidangdi. Tamalen AKKOR yamala timtem agi Ao Senden-i sota ayu masü na? Süra tang kechiba nenok anemabo keno mebenoktsü?

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

All Churches Trust-i Covid atema Pound sen million 5 agütsü



Allchurches Trust aser Youth Trust züngsemtem külemi tangokba noksa nung angur.

May 24, 2021: UK nung charities tulutiba rongnung kati Hope Beyond programme takok ngua inyakba osang metetdaksü; parnoki coronavirus wara mapang nung nūburtem yaritsü atema Arogo aser Khristan charities 700 dak tema nem senotsü teyari agütsüogo.

Allchurches Trust-i Hope Beyond programme kübok Pound sen million 5 dak tema agütsüogo, aser iba senji ajanga Arogo aser charities telok

balalai nūburtem nungita yariba, mental health aser digital resilience atema amshi.

Organisation balalai coronavirus mapang nung nūburtem yaritsü atema Allchurches Trust nem temepishiba shidi agüja liasü.

1972 küm Allchurches Trust tentetba sülen tanü tashi nung parnoki Pound sen million 180 dak tema agütsüogo.

Trust-i Parents & Children Together in Reading charities nem-a Pound sen 5,000 agütsü.

Trusty-isa denomination balala nungi Arogotem nem teyari agütsü. Item Arogotemji Churches Together in England (CTE), Action of Churches Together in Scotland (ACTS), Churches Together in Wales (Cytun) aser Irish Council of Churches nung züngsem Arogotem lir.

Hope Beyond programme khenpiga atema anena atar, ajisüaka maneni Trust-i coronavirus tensa atema maneni teyari agütsütsü.

Kaduna State nung Tenla ki ka rongdoktsü aser Khristan 8 tepset

May 24, 2021: May 19, 2021 nü kiralongrartemi Kaduna State kübok Chikun area amakba mapang nung Tenla ki ka rongdoktsü aser Khristan 8 tepsetogo, ta International Christian Concern (ICC) osang ajanga metetdaksü.

Bodhbarnü Kaduna State Commissioner for Internal Security & Home Affairs, Samuel Aruwan-i sangdong ka ajanga iba osangji metetdakja liasü.

Kiralongrartemisa hopta tsüngda ki aika rongdoktsü aser Khristantem dak injang khaloktsü.

Tawa United States Commission on International Religious Freedom (USCIRF) 2021 annual report nung Commissioner, Gary L. Bauer-i, Nigeria linük ya Khristantem tepsetba tongti tesem ka kümogo, ta ashiba den külemi iba linük nung asalentong yanglur Khristantem jenti tepsetdar, ta metetdakja liasü.

Bauer-i, "Khristantem jenti tepsetba ya auertemi mesüra aluyimertem (Khristantem) aser kiset shiruru mesürtem (Muslims) tsüngda rara ajanga lir ta ketdangsertemibo ashir,

ajisüaka iba ya Islam yimsü alia amangertemi Nigeria nung Khristantem meshi-meshia samatsütsü nükjidong nung inyakba lir. Parnok nokdangtsüla," ta metetdaksü.

"Yimlibilema Nigeria nung Khristantem atema sarasademjang aser rara ajanga takoksa ngur mangyimertem nem tesünep agüjang ta sarasademjang. Iba dak alia reshikangshirtemi Khrista osangtajung angashiba ajanga temoatsü angutsü aser Khrista agizüktsü atema sarasademjang," ta ICC-i mepishia metetdaksü.

Mission Aviation Fellowship-i Yali kin nem Laishiba 2,500 agütsü

May 24, 2021: Papa New Guinea nung aliba Yali kin-i Khristan missionary tem tepseta liasü; parnoki arasenba mapa inyaka liasü aser nisung shi-a chia liasü, ajisüaka tangbo parnoki chichiba Tsüngrem bushir, ta osang ka ajanga metetdaksü.

Laishiba 1,400 bo tanurtem indang Laishiba lir, aser tanüngba Laishibaji Laishiba rangben (Tasen Lai & Tejen Lai) lir. Item Laishibaji Khristan telok- Mission Aviation Fellowship (MAF)-i Yali kin nem agütsü. Yali kin Arogo kati yim ka nem Laishiba magütsütetba ajanga Arogoi onok dang Laishiba meshisema liasü, ta MAF-i metetdaksü.

Tayimtsü anir rongnung ka aser Papua Operations Director, Dave Ringenberg-i, "Iba mapangji temeshi mapang ka liasü, aser onoki kodanga

mamatoktsü," ta ashi.

1965 küm tayimtsü amshia survey ka agiba mapang nung Mission Aviation Fellowship-i Yali kin alibaji jangja aser küm 55 sülen ang MAF-i tayimtsü ajanga parnok nem Laishiba bener otsü.

Laishibaji Yali oshi nung meyipzükba sülen parnok nem agütsü.

Küm 32 agia Yali oshi nung Laishiba meyipzükba sülen 2000 küm Laishiba ajak meyipzükba liasü. World Team missionary, Stan Dale aser Yali nunger nisung ka tenüng agi Luliap Pahabol nati senteper Mark kaket tama renema liasü.

Dale-i Tenyartem Mapa meyipzükba mapang nung pa den külemi inyaker Phil Masters naprongla 1968 küm Yali kini tepseta liasü.

Missionary Dale aser Phil nati Yali kin den Khrista

osangtajung lemsateptsü atema tayimtsü anentsü asoshi tesem ka bushiba mapang nung tena tepset, ta MAF-i metetdaksü.

Missionary temi arasenba anema jembiba agi Yali kin nungi rarartemi missionary anaji tepseta liasü. Parnoki missionary ana dak lasang 200 dak tema khalokja khaseta liasü.

Iba sülen Mission Aviation Fellowship indang tanabuba tayimtsü tsükok saka missionary tem tepsetba anema nokdaker Yali nunger kati pilot Paul anguba sülen tangar maru tashi pai Paul kümzükba liasü, ta MAF-i metetdaksü.

Missionary temi maneni parnok semdangba ya temaitsü ka asütsüa akok, ta Yali nungeri amanga Paul-i sayutsüngiba otem nendaka anga, aser tanem-tanemi Yali nunger aikati Khrista agizük. Tangbo Yali nunger Arogo 100 dak tema lir.

ANOGO ABEN TSÜNGREM DEN

Mesasatsü jashidaktsüba

"Kechiyong Tsüngremi mulungba amato jashidaktsüba agi tanaben mesasatsü tekümtet asoshi temulung meyipdaksür. Saka alima tejashibai tasüba adokdaksür". 2 Korint 7:10

Yisu alima nung alidang tesüngmangtsü mapa aika inyak. Saka Yisu indang tongtipangtibaji tesayubaji samar aliba menenpur ka temulung meyiptsü aser taküm tasen poktetbaji lir. Temulung meyiptsü indang Yohan Baptitsüba, Yisu nütsüngtem aser tejen lai nung ainkartemi nūburtem dang sayutsüngi. Temulung meyipbaji alima yimya ama jashiba masü, rongsen agi anüngba asoshi mepelaba masü, asüama ajurudang temulung raksaa ajepba masü, taküm junga melitetba asoshi jashiba masü, piladang menungraa ajepba masü.

Saka nisung ka temulung meyipba nung tatok nangzükba aser Yisu Khrista pei kümtetdakba aser Kibur ta nangzükba aser temenen nungi pilaba, koba ajanga tekümtet angur. Grik oshi nung temenen nangzükba ojangji metanoia: tetezü temulung melenshiba. Temulung melenshiba ajanga taküm melenshir. Temulung meyipba nung teyanglur Tsüngrem anema inyakba mapatem, Pai ashiba mangaba asoshi, Pa nungi pilar tazüokba maka pei sünütsü süa aliba asoshi jashia bilemba aser item mapatem asoshi tatok nangzükba aser tanaben meinyaktsü mulungtetba. Mesasatsüji asoshi iba lai tekong nung jembir. Sasaba asoshi mozü kecha mali mesüra sasaba ajanga tanaben jenjang yanglushitsü maongka mangur.

Sarasadem

Oba Tsüngrem ni kodanga mesasatsüsa kü menen asoshi teti jashia bilemdakjang. Amen

Pakistan linük nung Khristan nütsüng kanga ajema kümdar

May 24, 2021: Tesüiba küm asadangteta liasü, kechiyong 20 tsüngda Pakistan nung Khristan aika Bangkok, Khristan nütsüng kanga ajema Colombo, Kuala Lumpur aser kümogo, aser iba ya linük Jakarta-i ogo," ta metetdaksü. nung Khristantem UCAN den jembidang reshikangshiba aser Hyderabad nung tongti putir, Khristantem bendanga Samson Shukardin-i, "Züngya/züngdangba shidak mimshir. Khristantemi national identity cards atema temelung

Tawa 2017 küm Census magütsür aser Khristantem nung ajemdaker Pakistan anema inyakba kanga bulua Bureau of Statistics Report ataloker. Kechi sayangtsü, ta sangdonga liasü. Iba report asen nūburtemi shisabulur," ta nungji shia aliba agi, nütsüng metetdaksü.

Pakistan nung Khristantem reshikangshiba dak sendakba Khristan nütsüngbo shilem nung International Christian 1.27 dang lir aser Concern (ICC)-i ashiba agi, Khristantemji timbaka Punjab taküm January 1 nungi tenzüka province nung lir.

2017 census ajanga March 31 tashi nung Pakistan Khristan nütsüng kanga nung Khristantem anema ajemba jangjar, kechiyong inyakba tatalokba 25 liasü. 1998 census nungbo linük nung Item tatalokba rongnung-nütsüng shilem 1.59 bo Tsüngrem mezüngmeshi ta tai Khristan nütsüng liasü. tongloktsüba, yimsü nung

ajemdaker nisung tepsetba, jembidang taoba mapang Khristantem puer aoba, Caritas Asia nung regional kangshia Muslim yimsü dangi director, Bonnie Mendes-i, meyipdaksüba aser "Pakistan nung Khristan amokmerenba densema lir, ta nütsüng ajemtsü ta ni ICC-isa metetdaksü.

OLONG PAITEP # 5822

	1			2	3				
4			5						6
					7				
	8								
	9			10			11		
						12			13
14									
					15				
		16							

TIPILEN		LANGTSÜNGLEN	
2. Sü jeplok	- (4)	1. _ _ _ _ i	- (4)
4. O agi merenshi	- (5)	3. Kasa masü	- (6)
7. Ayongküm li	- (5)	5. Nüchi masü	- (5)
8. Chiyungtsü mapang süiadok	- (4)	6. Tashi endok	- (5)
9. Tsüngrem den jembiba	- (9)	9. Langtem	- (5)
12. Saklok	- (4)	10. Anü malidang	- (6)
14. Samaba mebushitet	- (5)	11. _ _ _ _ _ kibur	- (5)
15. Mejanga onü	- (5)	13. Tebur tembar tsüngda	
16. Tzü shiruru ka	- (4)	jatepba	- (4)

OLONG PAITEP # 5821 TELANGZÜBA

TIPILEN :	LANGTSÜNGLEN :
1. Lemsä, 3. Osang, 5. Mezüng,	1. Lamän, 2. Sangken, 3. Omen,
6. Agi, 7. Süra, 8. Tebutem,	4. Asüküm, 7. Sendong, 8. Tejang,
9. Amen, 12. Odi, 13. Asayar,	10. Tanga, 11. Tazü.
14. Angsü, 15. Agima.	

TANUR DANG TIYAZÜ MEJEMBITSÜLA

S.S.Tesayur : Tanurtem...Tanubo tiyazü mejembitsü indang lesson sayudi... Shibai tiyazü jembidir molomi-i aotsü...Yisu-i sempatsü aser merenshitsü...Anungji tanu nungi shinga-ia tiyazü tejembi no. Ni taruba deobar -jibo "Nanglong" (Sweets) lema agutsütsü... anungji laishiba tekong-to 'Mokusto' sur arung noo.

Tanur tem : Ok...Miss....Ok...Miss....Ok....Miss....Ok....Miss....Ok. Ajisuaka Tesayur-lai Nanglong bentsütsü amaadoker maben.

Tanurtem : Ssssssss.....Ssssssss.....Ssssssss.....Ssssssss.....Ssssssss.....Ssssssss.

S.S.Tesayur : Tanurtem....tanupbo nenok kechiba Ssssssssss...Ssssssssss. ta tenarong nung angoker kechi miim o jembiteper...!!!???

Tanurtem : Miss...Nai onok dang tiyazü mejembitsü sayu...saka naia tiyazü jembigo...Nai Nanglong bentsütsü ta ashiba mebentsü...Anungji na-a Yisu-i merenshitsü...Na-a molomi-i aotsü...Hiii...hiii...hiii.

Lilir : L.Kika Pongener.

TANÜBO NAI LANGZÜANG

Q. Koba küm Russia aser China tsüngda Nuclear Energy Cooperation Project Agreement sign asü?
 A.2015 B.2018 C.2019 D.2020
 _____ (Taruba adok nung onoki langzütsü)
YASHI ADOK TELANGZÜBA : 2015

AO OSHI ANGAZÜKDAK:

TANÜ ANGAZÜKTSÜBA OJANG

Jangko

(n) Jang tasazük metetba oset (rice measuring basket)
 * Tsüraburtem mapangbo jang metettsü (measure) atema **jangko** amshi.

Jangnem

(n) tsük asendang jang tilala küma raksaba (broken rice)
 * Tsük junga makong ser asen dang **jangnem** kanga alur.



Tir Yimyim

NAI-A YA METETTER MA?



Alima nung gari timtiba bedena alir rongnung (private collector) Brunei indang 29buba Sultan, Hassanal Bolkihah alitsü. Hassanal ket nung billion dollar 5 alang gari 7000 jungnüa lir ta asadangteter. Sultan Hassanal indang gari collection rongnung Ferrari F40s, McLaren F1s aser Rolls-Royce dena lir. Sultan ket nung nungtugu Rolls Royce gari 600 aser Ferrari indang gari 400 dak tema lir.

SUDOKU # 5865

TELANGZUBA # 5864

4		7	6	3	2				7	1	3	9	2	8	6	5	4
6	1	8		7	9		3	4	5	9	6	1	7	4	8	3	2
		3	2		4	1		6	2	8	4	6	5	3	7	9	1
			3	8			1		8	4	9	7	3	2	1	6	5
					4	8	5	3	1	3	2	5	8	6	9	4	7
8	4		1	7					6	5	7	4	9	1	2	8	3
	2				5				3	6	8	2	1	5	4	7	9
		4					7	1	9	2	5	8	4	7	3	1	6
		5	4	9	8	3	6	2	4	7	1	3	6	9	5	2	8

OJANG LUTEP # 5408

SETEM :

ARK :

NGBNUO :

ATI :

UNJGA :

MOATTESÜ :

SMAÜ :

IMTETM :

ONGALENDNG :

URUAJR :

OJANG LUTEP TELANGZÜBA # 5407

TENÜKMEREMER ASER MOKOKACHIR TSÜNGDANG TAJUNG
 MESÜRA TAMAJUNG KECHA MEBENDANGI TILUTSÜR

TAN HOPTA ATEMA - KOMA SÜLA ?

Q. Tenla ki shibangtsüba masü lokti sentep malitsü ashiba dang, anungji asenok arogo shia nung lokti sentep mali tashi tenla ki azünga metoktsüi nisung ishishi lemsar kena manen sarasademba yinzü, Chain of Prayer, sentong tenzük nunga koma süla ?

Cyclone Yaas atema Amit Shah-i Chief Minister tem den senden amen



New Delhi, May 24, 2021: Cyclone Yaas agi India anüdoklen kongshitsü jelia Hombarnü Union Home Minister, Amit Shah-i video conferencing ajanga Odisha, Andhra Pradesh, West Bengal state tem nungi chief minister tem aser Andaman & Nicobar Islands Lieutenant Governor den review senden amendang tangokba noksa nung angur.

New Delhi, May 24 (Agencies): May 26, 2021 nikonngang Cyclone Yaas agi India anüdoklen kongshitsü lia Hombarnü Union Home Minister, Amit Shah-i video conferencing ajanga Odisha, Andhra Pradesh aser West Bengal state tem nungi chief minister tem aser Andaman & Nicobar Islands Lieutenant Governor den senden mena terenemshiba jenjang asadangogo.

Senden nung Union Home Minister-i chief minister tem dang cyclone agi kongshiba tesemtem nung hospitals & Covid care centres, talisa ICUs nung light power supply methitemi agütsütsü atema renema alitsü metetdaksü.

"Shirangertem nem ventilators/oxygen supply

methitemi shidak agütsütsü atema ICU aliba hospital tem nung electricity backup achaayangtsüla," ta Amit Shah-i ashi.

Amit Shah-isa state tem nungdang apir Centre sorkari Armed Forces aser paramilitary sepaitem den NDRF teams agütsütsü, iba denji külemi relief aser kümzükba maparen nung amshiba osettem agütsütsü, ta metetdaksü.

Amongnü Ato kilonser, Narendra Modi-ia sorkar tongti ketdangsertem den senden mena cyclone Yaas atema terenemshiba jenjang asadanga liasü.

Iba senden nungji Amit Shah den National Disaster Management Authority (NDMA) nungi tongti ketdangsertem, Telecom,

Power, Civil aviation aser Earth Sciences Ministries nungi secretary tema aden.

Armed Forces-i tayimtsü ajanga National Disaster Response Force (NDRF) sepa 950 item state-i belena liasü aser lendong atema helicopter 26 renema lir.

May 26 nikonngang Cyclone Yaas-i Odisha aser West Bengal tzüyimkümlen kongshitsü, ta India Meteorological Department (IMD)-i metetdaksüogo.

Hombarnü IMD-i twitter ajanga, "East central Bay of Bengal nung aliba mopung tesashi agi Cyclonic yipru 'Yaas' kümteetogo aser tang Port Blair nungi kilometer 600 shi pilaa lir. Taruba ghonda 24 tsüingda iba yipru ya ano tesashiba aküimtsü," ta metetdaksü.

Covid agi asürtem certificate nunga PM Modi noksa amshitsüla: HAM

Patna, May 24 (Agencies): Taoba mapang Bihar Chief Minister aser Bihar nung NDA teloktep nung densema aliba Hindustani Awam Morcha (HAM) Tir, Jitan Ram Manjhi-i vaccination certificates nung Ato kilonser, Narendra Modi noksa keta aliba ashishia pai, linük nung coronavirus tashidak agi asürtem certificates nunga Modi noksa amshitsüla, ta ashi.

Hombarnü Manjhi-i twitter ajanga, "Linük nung corona vaccine agütsüba atema Ato kilonseri tenüing tajung agir. Linük nung coronavirus tashidak agi asürtem asüba

certificates nunga pa indang noksa amshitsüla," ta metetdaksü.

Amongnü Jitan Ram Manjhi-i, shidakba agibo vaccination certificates nung linük Tir noksa mesüra state balala nung Chief Minister tem noksa amshitsüla, ta jembia liasü.

Bihar nung BJP-i aniba teloktep NDA nung Manjhi'er party-a densema lir, anungji pai Modi aija jembiba ajanga yimtenren nung mangatetep adoksüa akok.

2020 küm Bihar Assembly election nung JDU-i

lemzüktsüba menden nungi Manjhi-i aniba HAM-i menden pezü nung takok ngua liasü.

BJP sorkar maliba state tem-Jharkhand, Chhattisgarh aser Rajasthan nung chief minister temi, parnoki tanga linüktem nungi vaccine alizüka nübür nem vaccine agütsür, saka vaccine agütsüba atema BJP-i tenüing tajung agir, ta aitsüogo.

Bihar Chief Minister aser JDU tongti, Nitish Kumar-ia yamaji bilema alitsüa akok, ajisüaka state nung single largest party ji BJP asübayong pai state nung vaccination programme atema tenüing tajung magiteter.

India nung ano nisung lakh 2.22 dak Covid putet aser 4,454 asü

New Delhi, Monupii/May 24 (Agencies): India nung anogo shia coronavirus case tajemba putetdar ajisüaka iba tashidak agi asürtembo timba akümer; tesüiba ghonda 24 tsüingda linük nung nisung 2,22,315 dak coronavirus putetogo.

Tesüiba ghonda 24 tsüingda linük nung coronavirus agi shiranger nisung 4,454 süogo, ta Hombarnep 8:00 ako nung Union ministry of health & family welfare-i metetdaksü.

Tang linük nung coronavirus agi teshirangdakpur 27,20,716 dang kümogo aser ibaji coronavirus caseload nungi shilem 10.17 dang lir, ta Health Ministry-i metetdaksü.

Linük nung coronavirus agi shiranger shilem 88.69 (nisung 2,37,28,011) anepogo aser iba tashidak agi shiranger asüba shilem timba kuma 1.14%

kümogo. Tesüiba ghonda 24 tsüingda coronavirus agi asürtem (4,454) ji Maharashtra nung 1,320, Karnataka nung 624, Tamil Nadu nung 422, Uttar Pradesh nung 231, Punjab nung 192, Delhi nung 189, Kerala nung 188, West Bengal nung 156, Bihar nung 107 aser Andhra Pradesh nung nisung 104 asüba densema lir.

India nung coronavirus agi nisung timba asüba state temji Maharashtra (88,620), Karnataka (25,282), Delhi (23,202), Tamil Nadu (20,468), Uttar Pradesh (19,209), West Bengal (14,364) aser Punjab (13,281) state tem lir.

Amongnü linük nung samples lakh 19 dak tema tendangogo aser samples ajak agi crore 33 dak tema tendangogo, ta Health Ministry-i metetdaksü.



May 24, 2021 nü New Delhi nung aliba Covid-19 Vaccination Centre ka nung vaccine atemba sülen Delhi Civil Defence volunteers agisüingzükba noksa nung angur.

GNCTD Act atema HC-i Centre aser Delhi sorkar dang telangzüba meshir

New Delhi, Monupii/ May 25 (Agencies): Government of National Capital Territory of Delhi (GNCTD) Amendment Act ya linük temzüng alema ta sangdongtsüla, kechiyong iba Act ajanga Delhi Lieutenant Governor nem tashi tali agütsür, ta temepishiba ken o benoka aliba dak sendakba nung Hombarnü Delhi High Court-i Centre aser Delhi sorkar na dang nungi telangzüba meshiogo.

Iba Act ya taküm April 27 nü mapa kuma benokba sülen tang agi tasembenbuba iba Act anema High Court nung temepishiba ken o agütsür.

Chief Justice DN Patel aser Justice Jyoti Singh nati akümba bench-i, tamalena iba Act anema temepishiba ken o ana agütsüdag Centre aser Delhi sorkar na dang nungi telangzüba meshia liasü, ta metetdaksü.

Tamalen GNCTD Amendment Act anema lawyer ka aser law student ka nati temepishiba ken o balala agüja liasü aser tang tesüsa Aam Aadmi Party (AAP) züingsem katia iba Act anema temepishiba ken o agütsü.

High court-i Law Ministry aser Delhi sorkar naprongla na dang Neeraj Sharma-i temepishiba ken o agütsüba dak sendakba nung telangzüba agüjang, ta tuyu.

Sharma-i, tang yanglushiba GNCTD Act ya fundamental temeden balala anema lir aser linük temzüng kübok Arlla 239AA anema lir, iba denji külemi Supreme Court-i Lt Governor (LG) dak public order, police aser ali dak sendakba tashi agüja lir, saka pai Council of Ministers tetuyuba kübok inyaksü ta obendang agüja lir, ta metetdaksü.

Tamalen lawyer kati High Court dang, iba Act ya ajanga linük yimtiba, Delhi nung shibai telemtetba agitsü (CM asü LG)?, ta sensotem ratamatatsü, ta metetdakja liasü.

Ano law student katia High Court dang, iba Act ajanga Delhi sorkarji Lt Governor, ta ashir aser Delhi Assembly tashi nokdanger; iba Act ya Supreme Court obendang alema lir, kechiyong Supreme Court-i, LG-i Council of Ministers kübok inyaksüla, ta obendang agüja lir, ta metetdakja liasü.



May 24, 2021 nü Lucknow nung Black Fungus agi shiranger kinüingertem Red Cross Society office kima injections meshitsü atema atatepdang tangokba noksa nung angur.

Suu Kyi-i military inyakyim anema jemb

Yangon, Monupii/May 24 (Agencies): Pua aliba Myanmar lenir Aung San Suu Kyi-i, coup sülen Hombarnü mezüngbuba lokti nung jembiba mapang military anema jembigo, aser lar party ya nübürtem ali tashibo mesamai alitsü ta ashi.

February 1 nü military-i sorkar atsüngtokba sülen Myanmar ajunga nung anogoshia nübürtemi longkak aita arudar. Tang tashi nung military-i nisung 800 dak tema tepsetogo, ta local monitoring group kati metetdaksü.

Coup sülen mezüngbuba okadak nokdakba mapang Suu Kyi-i la okatsür dang, junta-i lar party loksatsütsü merangaka nübürtem ali tashibo lar party; National League for Democracy mesamai alitsü ta ashi.

Lenir shiba coup sülen lokti nung ken danga nokdaka mali, la anema lir aser kanga temulung lema lir, ta Min Min Soe-i AFP dang ashi. "lai lar

nübürtem anema lidaktsüner aser nübürtem ali tashibo NLD alitsü kechiyong iba ya nübürtem atema ngutetba lir, ta shiogo," ta Soe-i ashi.

Suu Kyi ya taoba küm election atema nüböyimba mapang coronavirus dak sendakba nung tenokdangba agütsür aliba anema inyakba aser license maliba walkie-talkies yua aliba atema aija lir.

Hombarnü linük yimtiba Naypyidaw-i security tem aika yoka meita ataogo, ta AFP osangbener kati ashi. Khen atema amenokba okadaki aoba lenmang dena police garitemi nokdanga yur liasü.

Suu Kyi anema benokba ken o angadangsü atema hopta aika ataogo aser la okatsür la den ajuruteptsü atema kanga timtema aruogo.

Ken o maneni June 7 nü angadangsü, ta Min Min Soe-i ashiba den lai taoba tir Win Myint dena ajuruteptogo, ta ashi, shiba Suu Kyi den külemi sota yua lir.

Samoa indang Ato Kilonser parliament telungi maitdaksür

Apia, Monupii/May 24 (Agencies): Samoa nung tetsürtem rongnungi ato kilonser mezüngbuba parliament telungi maitdaksü shibanga ayuba sülen süki ka nung tenangzüktep agia liasü.

Fiams Naomi Mata'afa-i ato kilonser inyaksü atema tenangzüktep ya parliament indang atsüki nung agia iba Pacific asetkong linük nung shibai yimsü asütsü, ta mejangjai kumdaksür.

Tuilaepa Sailele Malielegaoi, shiba küm 22 tashi ato kilonser inyaka aru, aser court ajanga pa dang ato kilonser menden nungi alutsü totuyuba agütsüba pai senzüka yutsü.

Arishi küm 64 tain Mata'afa ya tenzüngzüktep agitsü teimla nung Hombarnü parliament-i arua liasü.

Saka la ya linük indang chief justice den külemi aruba mapang Malielegaoi busemertemi jelia arua parliament telunglen nungi shibanger liasü.

Iba sülen Mata'afa aser lar Faatuatua i le Atua Samoa ua Tasi (FAST) party züngsemtem ya linük yimtiba, Apia nung aliba parliament indang atsüki nung süki tuluka yanglua alidak adenshia melentepa tenangzüktep agia liasü.

Sangdong ka nung FAST party ajanga, "Democracy temaba südaktsütsüla. Iba tamendak dak tangatetba nungi shinga jembua malitsüla. Shirnoki tim masüba inyaker, parnoki mi den asayar," ta ashi.

Par anemertemi iba sentong ya magizük aser

Malielegaoi-i iba sentong ya ozüng alema inyakba lir, ta aitsü.

Samoa general election nung tejangja takok angur maliba yong telok ana tsüngta atsütepa ken o benoktepa aru.

Malielegaoi'er Human Rights Protection Party (HRPP) ya küm 40 shi yimsü süa aruba sülen Mata'afa'er FAST party ajanga atsüngdok. Telok anaprongi menden 25 angu saka independent MP kati FAST busema nokdak.

Iba yongji HRPP puri ashishitepa par den tokteper temi parliament nung züngsem tetsür shimtsü aliba ama meinyak, ta aitsü. Samoa election commission ajanga April nung agiba election result magizük aser May 21 nü election tasen agitsü metetdaksü.

Saka election agishitsü anogo pongu lia linük nung tematiba court ajanga UHPP anema obendang agütsü aser Mata'afa dang tenangzüktep agitsü totuyuba agütsü.

Küm 22 tashi yimsü süa aruba sülen Malielegaoi ya alima nung ato kilonser talangtiba inyaker jenjang tanabuba nung lir.

Iba asetkong linük nung tetsür deputy prime minister mezüngbuba inyakba sülen general election nung takok anguba ajanga Mata'afa ya iba region nung sorkar ka tekolak süer anitsü tetsür tanabuba akum.

La ya Samoa nung mezüngbuba ato kilonser indang jala lir, shibai 1980s mapang nungi yimtenren nung kanga yakyaka shilem agia arur.

Japan nung teintet rogotem atema vaccination centre lapoker



Tokyo nung vaccination center tasen ka lapokba nung teintet rogortem coronavirus mozü, Moderna agitsü atatepa aliba noksa nung angur. Japan nung anogoshi teintet rogo 15,000 nem coronavirus mozü agütsütsü nükjidong nung Tokyo aser Osaka yimti nung vaccination center tem lapoka lir.

Tokyo, Monupii/May 24 (Agencies): July ita Olympic Games metenzükdang Japan nung teintet rogotem timba nem COVID-19 mozü agütsür alitsü nükjidong nung Tokyo, Osaka aser danga yimitem nung 'mass inoculation centre' tem lapokogo.

Hombarnü lapokba centre tem nungya anogoshi nisung meyerijang aika nem mozü agütsütsü, anungji Japan nung kanga meilongi mozü agütsüba maparen nung yarisemtsü, kong ketdangsürtem coronavirus wave pezübuba den rarar.

"Yakta agia ayu tajungba. Kanga junga agiogo," ta arishi küm 66 tain Tetsuya Urano-i ashi, shiba Japan yimtiba nung mozü mezüng agirtem liasü.

Tokyo nung iba facility ya mitkar indang doctor aser nurse

temi anepalutsü, koba taruba ita asem tashi anogo nung ghonda 12 lapoka anogoshi nisung 10,000 nem mozü agütsütsü.

Japan anüolen tsütsü Osaka yimti nung anogoshi mozü 5,000 shi agütsütsü. Aichi, Miyagi aser Gunma ama prefecture tem nung sorkari mozü agütsüba tesem tulu lapoka lir.

"Mozü tekeraba nung agütsüba yagi asenok tali kumzüka ayur amai bilemer, kechiaser iba yagi asen libaliru aser rongsenketsüng nung kongshir," ta arishi küm 71 tain office nung inyaker Munemitsu Watanabe-i Tokyo nung mozü agiba sülen ashi.

"Nütsüng yongsük shilem 80-90 tashi mozü agitetra, Olympics tajungtiba nung litettsüb amai bilemer," ta pai ashi.

COVID-19 cases tali

akümba aser Olympic anema linük tesem ajungalen ola adokba mapang Ato Kilonser Yoshihide Suga-ibo vaccine centre ya taoba ita lapoktsü ayongzüka liasü.

Tang Tokyo aser danga tesem tuko, kong Japan nütsüng yongsük shilem 40 lir, yangji virus dak sendakba state of emergency sangdonga lir, koba May 31 nü tembangtsü.

Danga linüktem amabo masü, Japan nung coronavirus agi kongshiba kanga ajema lir, kong iba tashidak wara tenzüker tang tashinung nisung 12,265 dang süogo.

Saka mozü agütsüba maparen kanga anüalemba mech sorkar aitsü. Nütsüng yongsük million 125 aliba linük, Japan nung shilem 4.4 dang mozü ya dose kabo agir lir.

Covid tang mazüoktetra asenok samatsü: Bhutan PM

Thimphu, Monupii/May 24 (Agencies): Bhutan Ato Kilonser Lotay Tshering-i, par linük nung Covid-19 pokteta aliba shisabulua bilemba lemsatepogo aser ashiba agi, "tashidak tang mazüoktetra onok oshia samatsü."

Hokolbarnü linük den jembiba mapang Ato Kilonser

Tshering-i, linük nung wara pokteter küm ka ser tesadang ajunger, saka wara ano asemshia mao aser maneni lendong nung lir ta nenshia metetdaksüba, Kuensel sangdong ka ajanga metetdaksü.

"Linük nung nisung aikati Covid-19 tashidak anabenren

poktetba ajangshiba sülen mapang tamajungbabo süitemogo, ta bilemer. Kasa mapang nung vaccine ngutetba ajanga aika nem timla agütsü," ta Lyonchhen-i ashiba den "ajisüaka asenok tanü kechi tia nung lir repringang," ta ashi.

(Maneni tapak 9 nung...)



Italy north tsütsü Piedmont region nung aliba Stresa-Mottarone tenem nung cable car ka tsükba sülen yangji tekümzükertemi yaritepba noksa ka yangi angur. Deobarnü northern Italy nung tepour tajung awatsüng repringtsü atema tenem kolaki cable car ka nung nisung mener atoba mapang ali nung tsüka tsünglangleni longzüka alu aser iba lendong nung nisung 13 asü.



Nagaland Bible College
Accredited by Asia Theological Association

Artang Ward, Mokokchung, Nagaland - 798 601.

ONLINE ADMISSIONS OPEN FOR 2021-22 Academic Session

Accreditation	Courses	Duration	Eligibility
ATA	Master of Divinity (M.Div.)	2 Years	ATA - B.Th. with B grade and above.
		3 Years	Any recognized Bachelor Degree / Non ATA B.Th.
	Bachelor of Theology (B.Th)	3 Years	10 +2 or Equivalent
	Diploma of Theology (Dip.Th.)	2 Years	10th Pass
Non- ATA	Master of Divinity (M.Div.) D.L.	3 Years	ATA - B.Th. with B grade and above.
		4 Years	Any recognized Bachelor Degree / Non-ATA B.Th.
	Certificate of Theology (C.Th.)	1 Year	8th Pass

Last Date to Apply: June 10, 2021

Apply Today by following any one of the simple steps given below:

- Scan the QR code to apply online:

OR

- You may visit our website: www.iicsmokokchung.com/nbc/application-2/

OR

- You may contact us : +91 94366 07340, +91 90898 68226, +91 98565 44584, +91 96124 14989, nbcsmokokchung@gmail.com



Tayimtsü ka nung Covid-19 ozüing raksa kiyimba sentong agi

New Delhi, Monupii/May 24, 2021 (Agencies): India nung tanabuba Covid-19 prokba akok tashi aziüoktsü asoshi mera tapet agia maparen inyakba mapang ka nung, kiyimba sentong densema lokti adenshiba sentong/senden nungi pilar alitsü/athitsü asoshi Sorkar ajanga ozüing takangtem sangokja lir.



Tang ama nüburtem Covid-19 agi rokongba/timtemba tialongnung, Madurai nungi temeimteper (tetsür o tebur) anati, Covid-19 dak sendakba temzüing kecha nung manidaki anüing tom (tayimtsü nung) nung kiyimba sentong ayongzüoktsü asoshi telemtetba agi.

Iba sentong dak sendakba nung DGCA-i report ka meshiogo aser asüingdangyatsü atema SpiceJet flight (kiyimba sentong agiba tayimtsü) indang crew tem mapa nungi khen anendakja lir, ta ANI sangdong ka ajanga metetdaksü.

Social media sabang nung viral küma aoba video ka nung, Madurai nungi temeimteper ana ya par medemer aser kinungertemi mekütbanger tayimtsü ka nung kiyimba sentong agiba sayur.

Iba kiyimba sentong atema parnoki SpiceJet ka mekaa ayu aser sentong nung adener ajak iba tayimtsü nung mener Madurai nungi Bengaluru tashi ao. Madurai nungi Bengaluru

tashi aoba mapang iba kiyimba sentong agia liasü.

Tena kiyimba sentong indang video, koba tayimtsü nung Covid-19 dak sendakba tekümdangtsü mera kecha nung manidaki agia liasü, iba video social media sabang süngadok.

Second 7 video clip, koba user @DonthuRamesh-i lemsatep, iba video nung, kiyimsang aser kiyimla - Rakesh o Dakshina naprongla meküta alirtem (sentong nung adenertem) ya tejak nembangba mask tasüsa meinoki aser social distancing temzüing mamshi tangoka lir.

Online ajanga iba kiyimba sentong indang video lemsatep asünung, iba video clip ya social media sabang balala nung prokshio go aser tang ama tensa ka nung Covid-19 temzüing alema inyakba atema nübur aika jashidakja aser online nung nüburtemi apuani kanga aitsüogo.

SpiceJet otongdar kati

ashiba agi, telok kati kiyimba sentong temer sülen, südoksünema senzütsü tebilemba nung, May 23, 2021 nü Madurai nung 'travel agent' kati 'Madurai nungi Bangalore' tashi aotsü atema 'SpiceJet Boeing 737' mekaa liasü.

"Iba telok dang Covid-19 tetuyuba ajak nung anidaksü asoshi metetdaksü aser iba den külemi tayimtsü telung nung tanga inyakyim/sentong kecha magitsü asoshi temelaba magütsü," ta email ajanga indianexpress.com dang SpiceJet otongdar ajanga metetdaksü.

"Cabin crew ajanga iba telok dang Covid-19 dak sendakba tekümdangtsü meratem nung anidaksü asoshi lephsia shiogo aser iba den külemi tayimtsü telung nung noksa aser video tangoktsü memelaba densema DGCA ajanga latetta aliba temzüing ajak nung anidaksü asoshi nenshia metetdaksü," ta otongdari ashi.

Ajisüaka, iba tayimtsü nung amener passenger temi Covid tetuyuba nung manidaki. Ozüing agi melaba ama, airline ajanga mera tapet agitsü. DGCA-isa iba maparen dak sendakba nung bushisüingdangtsü tenzüokogo, ta sangdong nung shia lir.

Maneni, Covid-19 wara prokba ajemdaksütsü asoshi Tamil Nadu State-a May 31, 2021 tashi lockdown alitsü.

Covid tang mazüoktetra asenok... (Tapak 8 nungi...)

Paisa, Bhutan-i parnok temeket nung tensa kanga mejungi akümba ajanga kongshiba jangjaa lir. Lenla ajak nung kanga meranga renemshiaka India nung ajangshiba ya linük nungbo majangshitsü ta tejangja ka mali, ta ashi.

"Anüolen tip len nungi amokmerena aliba tang anüdoklen tongogo. Asenok kümdanga melira, kidanger ama kasa tia-i asenok aitsü," ta pai ashi.

Lyonchhen-i ashiba agi, SARS-CoV-2 virus kanga kara melenshiba aser tali tekaraba menatepyonga aoba ajanga lendong tuluba kümdaksü. Pai, linük kinüksü ajak nungi tanem tanemi meketbangdar aser jenjang tapet magiba den nüburtemi wara nungi jenboa alitsü atema tetuyuba agütsür aliba sülen manidakra, linük mapang tatsüka tsüingda nung tawadakkak makai akümtsü, ta ashi.

"Asenoki tang tashidak

menatepa aoba menokdangtetra asenok mapang tatsüka tsüingda okshia samatsü," ta Ato Kilonser-i ashi.

Kasa mapang nung Trashigang jila May 21 nü aonung 7 ako nungi mokdanga yuogo aser Yonphula domestic airport-i tayimtsü ka danga marudaksü.

Bhutan nung tang tashi nung nisung 1,392 dak tashidak potetogo aser tashidak agi nisung ka süa lir. Tang tashi nung vaccine 482,038 agütsüogo.

Office of the Dimapur Molungyimsen Kaketshir Telongjem

Tsürabur asür **Shilukaba Imsong** den molungko lemsateper.

Ozü tsürabur Shilukaba ya Dimapur Molungyimsen Senso Telongjem nung tongti lenir rongnung tongtipang nisung ka, aser maparen aika nung amshia inyaka aruba taküm ka liasü. 2018 küm nungi pa Dimapur Molungyimsen Kaketshir Telongjem treasurer pai bena aruya lia tesasatsüka pa taküm tempangoko. Pa shisa lentong aser pa lenisüba nung onok shisa tajung aika ngua aruogo. Tanü onok tsürabur tajung ka akümüli nungi pila aoba atema onoki kanga dang temolung kua-a sasaba lemsateper.

Tanü taküm meliaka pai onok awabanger aniba onoki kodanga mamatetsü. DMKT-i pai toksür aoba kibong den mangyim tejashi külem lemsateper.

DMKT tenüing nung,

Sd/-
Impangti Tzudir
President, DMKT



Sd/-
P. Lensala Tzudir
Asst. Secretary, DMKT

MULUNGSÜNEP O

"Kibubai agütsü aser Kibubai bener ao. Kibuba tenüing moajang." Yob 1:21.



ASO:
6.04.1978

ASÜ:
19.05.2021

Jabaso tajung ka aser tebu tajung ka, asür **K.Tiasünep Tzudir** pa shiranga aliba mapang nungi taküm tembangba anogo tashi kija, kibong, arogo, yimten aser lokti shirnokisa sarasadem, nübo, shisatsü aser rongsen agi nungita yaritepogo, nenok ajak dang onoki kanga pelaba lemsateper. Nenok tsüingdong arua pelaba meshitetaka, Teyanglur Tsüingremi nenok mapa tajung asoshi moatsütsü ozü sarasadem.

- Temeim kinungtsü, jala-jabaso, tsürabur & kinungertem.

Happy Birthday

Tenüing : Alisen
Tasoba anogo: 25 May 2020
Küm : 1
Talidak : Signal Angami village, Dimapur

Tsüingremi jala Alisen taküm tasoba anogo nungi küm ka tashi anema len anir arunung Tsüingrem tenüing asanger. Ano maneni Tsüingremi jala nung arishi talang moajang ta onok sarasadem. Amen.



Temiem Oba, oja, odi, otsü, obu aser onü nunger.

India nung Black aser White fungus sülen 'Yellow fungus' putet

New Delhi, Monupii/May 24, 2021 (Agencies): India nung Covid-19 wara mekokteti lia, nisung aika dang black aser white fungus tashidak puteta aoba mapang ka nung, nisung ka dak Yellow Fungus putetba osang angazükogo.

Hombarnü (May 24, 2021) National Capital Region (NCR) kübok Ghaziabad tesem nung mezüing yellow fungus tashidak putetogo aser osang ajanga angazükba agi iba tashidak (yellow fungus) ya black aser white fungus dang kanga agi tesashiba/tamajungba lir.

Ghaziabad nung Yellow Fungus tashidak puteta alir patient ya ENT surgeon Dr Brij Pal Tyagi indang mozüki nung anepaludar.

Health takotet temi ashiba agi, iba yellow fungus tashidak indang temaitsü temji - anüalema/temang lula odaktsür, temang touzük ajemdaksür, chiyongtsü jangratema machir

mesüra chiyongtsü khenyongi dang mechinü akümer.

Iba den külemi yellow fungus tashidak kanga mejungi akümba temaitsüji temang nungi komosettsü adoktsü akok. Kasa mapang, iba tashidak yagi temang nung komo-longra junga manepdaksür mesüra komo-longra tem aneptsü asoshi mapang talanglang agir.

Iba den külemi yellow fungus tashidak kanga mejungi akümba temaitsüji temang nungi komosettsü adoktsü akok. Kasa mapang, iba tashidak yagi temang nung komo-longra junga manepdaksür mesüra komo-longra tem aneptsü asoshi mapang talanglang agir.

Yellow Fungus agi shirangertem tenükjang naroka yiadoker aser tepok telung nung aliba shilem balala agi mapa junga meinyaki akümer aser temang indang shilem balala (organ) nung cells südaksür ta metetdaksü.

Euro 2020 Squad nung Sergio Ramos mezüngok

Monupii/May 24, 2021 (Agencies): Spain coach Luis Enrique-i Hombarnü defender tejen Sergio Ramos pa indang Euro 2020 squad nung mezüngoksem aser centre-back Aymeric Laporte aniokogo, ta ashi. Laporte ya tawa senso melena liasü.

Arishi küm 35 tain Real Madrid captain Ramos, yiruba ajanga iba season junga masayateti aruogo aser küm tenzükba sülen pa asaya pongu nung dang shilem agia lir. "Iba telemtetba agitsü kanga tasak liasü, saka pa iba season junga masayateti arudar aser January nungi tang tashi nung training-a junga magidangi arudar," ta Luis Enrique-i asayatem tenüng sangdong mapang ashi. "Ni pa den yashi jembiogo aser osang agütsütsü kanga tasak liasü. Ni mepelai bilemer, kechiyong pa kanga

professional lir aser pai national team nem teyari tulu agütsür aser tarutsü nunga pai teyari agütsütetsü. Ajisiüaka asayar tajungtibatem shimtsü nüngdaker," ta coach-i ashi.

Ramos dena meshimba tetezü Spain team nung Real Madrid nungi asayar ka danga mali.

Arishi küm 26 tain Manchester City defender Laporte ya southwest France nung aso aser France team nungi asayatsü atema asembe tashi jaogo, saka khen danga asayatsü atema maongka magu.

France coach Didier Deschamps atema central defender shimtsü asoshi asayatem aika lir, ajisiüaka 2018 küm Gerard Pique asaya nungi anenba sülen Luis Enrique atema central defender shimtsü asoshi maongka aikabo mali.

Ramos anema aliba mapang

nungbo team nungi kodanga mezüngtoker aser pa Villarreal nungi Pau Torres, Real Sociedad nungi Inigo Martinez aser Manchester City nungi asayar Eric Garcia nung den külemi asayaa aruogo.

City nung kanga junga asaya tenzükba sülen 2019 küm Laporte temokok yiru aser iba season nungbo pa aibenbo masayai aruogo.

Spain squad:

Goalkeepers: Unai Simon, De Gea, Robert Sánchez

Defenders: Gaya, Jordi Alba, Pau Torres, Laporte, Eric Garcia, Diego Llorente, Azpilicueta, Marcos Llorente.

Midfielders: Busquets, Rodri, Pedri, Thiago, Koke, Fabian.

Forwards: Dani Olmo, Oyarzabal, Morata, Gerard Moreno, Ferran Torres, Adama Traore, Pablo Sarabia.

Pandya adianunai oxygen concentrators tenla agütsü



Monupii/May 24, 2021

(Agencies): India nung Cricket asayar adianuna Hardik o Krunal Pandya nati maneni COVID-19 wara pokteter aliba mapang timtem tekangshi nung alirtem atema teyari agüja, wara den rara aliba centre tem nem oxygen concentrators tenla agütsüiogo.

Tambusang Krunal, shiba India team nungi ODI aser T20 nung asayar pai Hombarnü Twitter ajanga iba osang sangdonga liasü.

"Temulung nung shiranga alirtem ajak tekaratiba nung taneptsü angutsü atema sarasadema item Oxygen Concentrators tema ya Covid centre tem nem agütsüdar," ta Krunal-i noksa dena tweet asü, shiba Indian Premier League nung Mumbai Indians nungi asayar.

Hardik-ia, social media ajanga wara den rara ya külemi longjemer inyakba ajanga koktetsü ta ashi.

"Asenok tongpang tulu ka teyongtsü nung lir aser iba ya longjemer inyakba ajanga koktetsü," ta Hardik-i ashi.

Iba ita tetenzüklen Hardik-i, teti Krunal densema par kinungertemi linük nung yimdam yimtsüngtem nung wara den raraba mapang teyari agütsütsü atema oxygen concentrators 200 tenla agütsütsü, ta sangdonga liasü.

India nung tang Covid wara tanaben poktetsür kanga mepetmesü tulu nung lir. Health ministry sangdong ajanga ashiba agi, taoba ghonda 24 tsüngda linük nung nisung 2,22,315 dak tashidak potetogo aser nisung 4,454 süogo.

Sushil Kumar mapang nungi anentsütsü Railways renema lir



Sushil Kumar

New Delhi, Monupii/May 24 (Agencies): Nisung tepsetba ken o nung aija Delhi Police-i apuba sülen wrestler Sushil Kumar mapa nungi anentsütsü atema Northern Railway renema lir, ta otongdar kati Hombarnü ashi.

Northern Railway nung senior commercial manager kati, Kumar ya 2015 küm nungi Delhi sorkar dangi deputation

nung yoker liasü, kong pa Chhatrasal Stadium nung school level nung saisapong terenlok atema Officer on Special Duty (OSD) ama inyaka liasü, ta ashi.

Pa indang deputation ya 2020 tashi atsülangtsü aser Kumar-i 2021 küm tashi atsülangtsütsü mepeshi, ajisiüaka pa temepishiba Delhi sorkari magizük aser Northern Railway dangi tanaben meyipa yok, ta

ketdangsüri ashi.

Hopta asem shi jenshia senzuba sülen Kumar yashi puogo. Chhatrasal Stadium nung arishi küm 23 tain wrestler ka tepsetba ken o nung aija Kumar aser Ajay na Delhi kübok Mundka tesem nung apu.

"Iba ken o dak sendakba nung Delhi sorkar nungi Deobarnü Railway Board-i report ka agizükogo. Pa anema ken o benoka lir aser pa mapa nungi agintsü," ta Northern Railway CPRO Deepak Kumar-i PTI dang ashi.

Ketdangsürtemi ashiba agi, pa mapa nungi anentsüba official osang anogo ka ana tsüngda sangdongtsü.

Ketdangsürisa, sorkar tenzükler ka ozüng alema inyakba maparen nung densema putetra pa/la ken o meben tet tashi mapa nungi anenja atar, ta ashi.

India tetsür cricket asayatem nem parnok shilem agütsütsü

New Delhi, Monupii/May 24 (Agencies): India tetsür cricket team nung asayatem shirnok taoba küm Australia nung T20 World Cup final tonga asayaogo, parnok nem senpet USD 500,000 anguba nungi parnok shilem iba hopta tatemi agütsütsü, ta BCCI ketdangsür kati Deobarnü ashi. Asayatem nem parnok shilem ano magütsü, ta osang temai adokba sülen iba osang sangdonga liasü.

UK 'Telegraph' newspaper sangdong ka nung, BCCI-i ano tang tashi taoba küm February March ita asayaba WC nung tanabuba jenjang nung tembangba senpet nungi asayatem shilem magütsüi lir, ta Federation of International Cricketers Association (FICA) ketdangser kati ashiba

sangdonga laisü.

Tetsür WC asaya final nung Harmanpreet Kaur-i aniba India team-i Australia mekoki liasü.

"India tetsür cricket team nung asayatem nem senpet nungi parnok shilem iba hopta tatemi agütsütsü. Inyakyim tenzükler inyaka odar aser parnok shilem yakta angutsü imlaa atar," ta ketdangsüri PTI dang ashi. Menomeyangba indang asüngdangba mapang pai, "senpet sen ya onoki taoba küm agizük," ta langzü.

BCCI nung asayatem nem taa agütsüba inyakyim ya yimya agi ita asem pezü agir.

Ajisiüaka covid wara poktetba ajanga taoba küm nungi Mumbai nung BCCI indang headquarters shibanger lir aser ibayongji asaya ajak nung

taa agütsütsü menoadok.

"Tetsür team kija nem taa magütsüba masü. Tensa majungba ajanga tebur team central contract, international match fees, tetsür tebur domestic fees agütsütsü tera menor," ta taoba BCCI ketdangpur kati ashi.

Paisa, "COVID tensa tamajungba maküm tsüngda-a domestic season March ita tembanger aser asayatem nem taa September ita tashi nungang agütsümar.

"Anungji BCCI-i kodang sen agizük aji jangjatsü nüngdaker. Asayamung tembangli senpet sen agizükler lira kanga menor saka inyakyim nung mapang tatsükabo agir ta metettsüla. Ni metetba tashibo tetsür aser tebur inyakyim kasa dang," ta pai ashi.

Canada swimming team-i pre-Olympic training camp athir

Tokyo, Monupii/May 24, 2021

(Agencies): Coronavirus wara süshia maoba dak sendakba nung tebilemetsü adokba ajanga 'Tokyo 2020 Olympic Summer Games' tenzüktsü lia, Canada swimming team-i Japan nung 'pre-Olympic training' sentong thitemtsüogo, ta Hokolbarnü Kyodo sangdong ajanga metetdaksü.

Pre-Olympic training camp nungi tukadoker telok (linük balala tenüng nungi shilem agitsüpur) 50 rongnung Canada team tesüsa tukur alitsü. Japan kübok Tokyo aser tongtibang yimti tem nung pezübuba Covid-19 wara nokdangtsü asoshi 'state of emergency' aliba ajanga iba training camp nung shilem agitsü team timba kati meyipadok.

Canada team nung swimming athlete aser coach 60 tashi anüolen Tokyo nungi kilometer 250 (mile 155) shi pilar Toyota city nung July 9 nungi July 30, 2021 tashi amungtsü renemer liasü, ta

Kyodo sangdong nung shia lir.

Anogo atsülangtsür aliba Games, July 23, 2021 tenzüktsü lhopta tuku dang anünga lia, iba Games ayonga asayaba ajanga tang ama Covid-19 tensa tamajungdang medical system nung ano khuret talila bendenloktsütsü ama nübürtemi tsübua bilemba nung International Olympic Committee asadangdar.

Olympic atema sentong tem renemshiba aser coronavirus dak sendakba nung tekümdangtsü meratem agitsü mechi asadangshia jembitsü nükjidong nung IOC aser tanga tentettem anogo asem tashi senden amenba Hokolbarnü tembangogo.

Reuters company kati asadangshiba densema nübürtemi pei tebilemba lemsatepba Hokolbarnü sangdongogo. Iba survey aser poll nung nübür aikati taküm tsüklawa mongpu mapang iba Games masayatsü aser iba asayamung athitsü mesüra anogo atsülangtsü asoshi tebilemba lemsatepogo.

BILEMDANGANG

"Aibelentem dak ajemdaker tarutsü yangluang."